

צְפַנְיָה

1 דבר יהוה אשר היה אל צפניה בן כושי בן גדליה
 בן אמריה בן חזקיה בימי יאשיהו בן אמון מלך יהודה:
 2 אסף אסף כל מעל פני האדמה נאם יהוה: 3 אסף
 אדם ובהמה אסף עוף השמים ודגי הים והמכשלות את
 הרשעים והכרתי את האדם מעל פני האדמה נאם יהוה:
 4 ונטיתי ידי על יהודה ועל כל יושבי ירושלם והכרתי
 מן המקום הזה את שאר הבעל את שם הכמרים עם
 הכהנים: 5 ואת המשתחווים על הגנות לצבא השמים
 ואת המשתחווים הנשבעים ליהוה והנשבעים במלכם:
 6 ואת הנסוגים מאחרי יהוה ואשר לא בקשו את יהוה
 ולא דרשהו: 7 הס מפני אדני יהוה כי קרוב יום יהוה כי
 הכין יהוה זבח הקדיש קראיו: 8 והיה ביום זבח יהוה
 ופקדתי על השרים ועל בני המלך ועל כל הלבשים
 מלבוש נכרי: 9 ופקדתי על כל הדולג על המפתן ביום
 ההוא הממלאים בית אדניהם חמס ומרמה: 10 והיה
 ביום ההוא נאם יהוה קול צעקה משער הדגים ויללה מן
 המשנה ושבר גדול מהגבעות: 11 הילילו ישבי המכתש
 כי נדמה כל עם כנען נכרתו כל נטילי כסף: 12 והיה
 בעת ההיא אחפש את ירושלם בנרות ופקדתי על
 האנשים הקפאים על שמריהם האמרים בלבכם לא
 ייטיב יהוה ולא ירע: 13 והיה חילם למשסה ובתיהם
 לשממה ובנו בתים ולא ישבו ונטעו כרמים ולא ישתו את
 יינם: 14 קרוב יום יהוה הגדול ומהר מאד קול יום

יהוה מר צרת שם גבור: 15 יום עברה היום ההוא יום צרה ומצוקה יום שאה ומשואה יום חשך ואפלה יום ענן וערפל: 16 יום שופר ותרועה על הערים הבצרות ועל הפנות הגבהות: 17 והצרתי לאדם והלכו כעורים כי ליהוה חטאו ושפך דמם כעפר ולחמם כגללים: 18 גם כספם גם זהבם לא יוכל להצילם ביום עברת יהוה ובאש קנאתו תאכל כל הארץ כי כלה אך נבהלה יעשה את כל ישבי הארץ:

2

1 התקוששו וקושו הגוי לא נכסף: 2 בטרם לדת חק כמץ עבר יום בטרם לא יבוא עליכם חרון אף יהוה בטרם לא יבוא עליכם יום אף יהוה: 3 בקשו את יהוה כל ענוי הארץ אשר משפטו פעלו בקשו צדק בקשו ענוה אולי תסתרו ביום אף יהוה: 4 כי עזה עזובה תהיה ואשקלון לשממה אשדוד בצהרים יגרשוה ועקרון תעקר: 5 הוי ישבי חבל הים גוי כרתים דבר יהוה עליכם כנען ארץ פלשתים והאבדתוך מאין יושב: 6 והיתה חבל הים נות כרת רעים וגדרות צאן: 7 והיה חבל לשארית בית יהודה עליהם ירעון בבתי אשקלון בערב ירבצון כי יפקדם יהוה אלהיהם ושב שבותם: 8 שמעתי חרפת מואב וגדופי בני עמון אשר חרפו את עמי ויגדילו על גבולם: 9 לכן חי אני נאם יהוה צבאות אלהי ישראל כי מואב כסדם תהיה ובני עמון כעמרה ממשק חרול ומכרה מלח ושממה עד עולם שארית עמי

יבזום ויתר גוי ינחלום: 10 זאת להם תחת גאונם כי חרפו ויגדלו על עם יהוה צבאות: 11 נורא יהוה עליהם כי רזה את כל אלהי הארץ וישתחוו לו איש ממקומו כל איי הגוים: 12 גם אתם כושים חללי חרבי המה: 13 ויט ידו על צפון ויאבד את אשור וישם את נינוה לשממה ציה כמדבר: 14 ורבצו בתוכה עדרים כל חיתו גוי גם קאת גם קפד בכפתריה ילינו קול ישורר בחלון חרב בסף כי ארזה ערה: 15 זאת העיר העליזה היושבת לבטח האמרה בלבבה אני ואפסי עוד איך היתה לשמה מרבץ לחיה כל עובר עליה ישרק יניע ידו:

3

1 הוי מראה ונגאלה העיר היונה: 2 לא שמעה בקול לא לקחה מוסר ביהוה לא בטחה אל אלהיה לא קרבה: 3 שריה בקרבה אריות שאנים שפטיה זאבי ערב לא גרמו לבקר: 4 נביאיה פחזים אנשי בגדות כהניה חללו קדש חמסו תורה: 5 יהוה צדיק בקרבה לא יעשה עולה בבקר בבקר משפטו יתן לאור לא נעדר ולא יודע עול בשת: 6 הכרתי גוים נשמו פנותם החרבתי חוצותם מבלי עובר נצדו עריהם מבלי איש מאין יושב: 7 אמרתי אך תיראי אותי תקחי מוסר ולא יכרת מעונה כל אשר פקדתי עליה אכן השכימו השחיתו כל עלילותם: 8 לכן חכו לי נאם יהוה ליום קומי לעד כי משפטי לאסף גוים לקבצי ממלכות לשפך עליהם זעמי כל חרון אפי כי באש קנאתי תאכל כל הארץ: 9 כי אז אהפך אל עמים שפה ברורה לקרא כלם בשם יהוה לעבדו שכם אחד:

10 מעבר לנהרי כוש עתרי בת פוצי יובלון מנחתי:
11 ביום ההוא לא תבושי מכל עלילתיך אשר פשעת
בי כי אז אסיר מקרבך עליזי גאותך ולא תוספי לגבהה
עוד בהר קדשי: 12 והשארתי בקרבך עם עני ודל וחסו
בשם יהוה: 13 שארית ישראל לא יעשו עולה ולא ידברו
כזב ולא ימצא בפיהם לשון תרמית כי המה ירעו ורבעו
ואין מחריד: 14 רני בת ציון הריעו ישראל שמחי ועלזי
בכל לב בת ירושלם: 15 הסיר יהוה משפטיך פנה איבך
מלך ישראל יהוה בקרבך לא תיראי רע עוד: 16 ביום
ההוא יאמר לירושלם אל תיראי ציון אל ירפו ידיך:
17 יהוה אלהיך בקרבך גבור יושיע ישיש עליך בשמחה
יחריש באהבתו יגיל עליך ברנה: 18 נוני ממועד אספתי
ממך היו משאת עליה חרפה: 19 הנני עשה את כל מעניך
בעת ההיא והושעתי את הצלעה והנדחה אקבץ ושמתי
לתהלה ולשם בכל הארץ בשתם: 20 בעת ההיא אביא
אתכם ובעת קבצי אתכם כי אתן אתכם לשם ולתהלה
בכל עמי הארץ בשובי את שבותיכם לעיניכם אמר
יהוה:

מודרני עברי ד תנ
The Holy Bible in Modern Hebrew

Public Domain

Language: עברית (Hebrew)

Translation by: Franz Delitzsch (1813–1890)

2022-06-14

PDF generated using Haiola and XeLaTeX on 21 Feb 2024 from source files dated 31 Aug 2023

53d9715c-3509-54f2-9e87-2cb0afdfb800